

Ilisserusiat pillugit inatsisip Kalaallit Nunaannut atuutilerneranik peqqussut

UAGUT MARGRETHEP AAPPAAT, Guutip saammaanneragut Danmarkip Dronningia
imaaliorpugut:

Ilisserusiat pillugit inatsit nr. 1431, 21. december 2005-mimeersumi § 75, eqqartuussisarnermik inatsisip aamma inatsisip assigiinngitsut allat pillugit inatsisip allannguutaat pillugit inatsit nr. 538, 8. juni 2006-imersumi § 110, imm. 4 (Politeeqarnerisup eqqartuussiviillu aqqissuuteqqinneqarnerat), nioqqusiat ilisarnaasorsorneqartarnerannut inatsisip, pillaasarnermik inatsisip, raatioqarnermik aamma isiginnaarummik ingerlatsinerit pillugit inatsisip kiisalu inatsisip assigiinngitsut allat allannguutaat pillugit inatsit nr. 1404, 27. december 2008-meersumi § 10, imm. 2 (Unioqqutitsilluni assiliinermut akiuniarnerit annertusinerat) naapertorlugit aalajangerneqarpoq, inatsisip Kalaallit Nunaannut atuutissasut, taamaalilluni ilisserusiat pillugit inatsit Kalaallit Nunaannut atuutilerpoq ulloq 1. juli 2010-miit ima oqaasertaqarluni:

Kapitali 1

Aalajangersakkat nalinginnaasut

§ 1. Sunaluunniit piliarineqarsimasoq, tunisassiornermi atorneqarsinnaasooq, aamma teknikkikkut ajornartoorummut aqqiissutaasinnaasooq, inatsit manna naapertorlugu qinnuteqaatigineratigut ilisserusiatut nalunaarsorneqarsinnaavoq.

Imm. 2. Inuk, ilisserusiamik sanasimasooq, imaluunniit inuk, piliamut piginnaatitaaffimmik nuutsivigineqarsimasooq, taassuminnga inuussutissarsiutitut atuinissaminut kisermaassisutut nalunaarsorneqarnermik pissarsisinnaavoq.

§ 2. Pilersitat ilisserusiatut nalunaarsorneqarsinnaanngillat, taamaallaat

- 1) paasisanut, ilisimatusarnermi teoriinut aamma matematikkimi periutsinut tunngasuugunik,
- 2) eqqumiitsuliornikkut pilersitanut tunngasuugunik,
- 3) pilersaarutinut, malittarisassanut imaluunniit isumalioriaatsikkut ingerlatani periutsinut, pinnguaatinut imaluunniit inuussutissarsiutitut ingerlatsinerimut imaluunniit qarasaasianut programminut tunngasuugunik imaluunniit
- 4) paasisutissanik saqqummiinernut tunngasuugunik.

Imm. 2. Pilersitat ilisserusiatut nalunaarsorneqarsinnaanngillat

- 1) sorsunnermi atortussianut tunngasuugunik imaluunniit
- 2) sananerini periutsinut tunngasuugunik.

Imm. 3. Imm. 2, nr. 2 apeqqutaatinnagu, piliat ilisserusiatut nalunaarsorneqarnissaat periarfissaavoq periutsinut makkununga, tassunga ilaallutik pilattaalluni imaluunniit peqqissaalluni suliarinninnermi imaluunniit nappaatip suussusersiniarnerani suliaqariaatsit inunnet imaluunniit uumasunut atorneqartut akuutissat akuutissanillu akuleriaakkat sananerini periutsit atorneqartut, imaluunniit pinngortitanut tappiorannartunut tunngasunit (mikrobiologiskiusoq) pilianik pilersitsinermi periuseq imaluunniit periutsit allat tekniskiusut.

Imm. 4. Naasut arlaaannut imaluunniit uumasunut uumasooqatigiit arlaannut ilisserusiatut nalunaartoqarneq ajorpoq. Pilersitap atorneqarnera teknikkikkut killilerneqarsimangippat naasut arlaannut imaluunniit uumasumut uumasooqatigiinneersumut ataatsimut aalajangersimasumut, ilisserusiatut nalunaarsuisooqarsinnaavoq, naak naasut imaluunniit uumasut pilersitsinermi pineqaraluartut. Naasut arlaat matumani inatsimmi paasineqassaaq naasooq immikkoortoq EF-imi

immikkoortukkaat illersorneqarnissaat pillugu Rådep peqqussutaani artikel 5-mimi (EF) nr. 2100/94-imi nassuiarneqartoq¹.

Imm. 5. Pilersitat nalunaarsorneqarsinnaassuseqartarput, naak pilianut, pinngortitanut tunngasuneersuugaluarlutik (biologiskiuugaluarlutik). Atortussiaq pinngortitanut tunngasumeersoq (biologiskiusoq), avatangiisinit pinngorfigisaanit immikkoortinneqarsimasoq imaluunniit periuseq teknikkiusoq atorlugu inissinneqarsimasoq, pilersitatut isigineqarsinnaavoq, naak pinngortitami nassaasaareeraluartoq. Atortussiaq pinngortitaneersoq (biologiskiusoq) matumani nalunaarummi paasineqassaaq atortussiaq, paasissutissanik genetiskiusunik imaqartoq, imminut assililluni pinngorteqqissinnaasoq imaluunniit biologiskimik assilillugu pinngorteqqinneqarsinnaasoq.

§ 3. Inuup timaata pinngoqqaarnerata aamma ineriartornerata piffiini assigiinngitsuni aamma taassuma ilamerngata nassaarinerinnanngua, tassunga ilaalluni genimi tulleriinnerit imaluunniit tulleriinnerit ilamerngata, pilersitatut nalunaarsorneqarsinnaassuseqanngillat.

Imm. 2. Imm. 1 apeqqutaatinnagu inuup timaata ilamernga, tassanngaanniit immikkoortinneqarsimasoq imaluunniit allatut teknikkiusumik periuseqarluni pilersinneqarsimasoq, tassunga ilaalluni genimi tulleriinnerit imaluunniit tulleriinnerit ilamerngat, pilersitatut nalunaarsorneqarsinnaassuseqartarput, naak ilaannakup taamaattup sananeqaatsimigut pinngortitaassutsiminik pinngorsimasup ilamerngata sannaa assigilluinnaraluaraa.

§ 4. Pilersitat ilisserusiatut nalunaarsorneqarsinnaanngillat, niuerpalaartumik atorneqarnerat ileqqorissaarnissamut imaluunniit torersuunissamut naleqqutuungippata.

Imm. 2. Atuineq ileqqorissaarnissamut imaluunniit torersuunissamut naleqqutinngitsutut isigineqassanngilaq, atuineq inatsisitigut imaluunniit aqutsinermi najoqqutassatigut inerteqqutaanera peqqutiginnarlugu.

Imm. 3. Imm. 1 naapertorlugu ilaatigut aamma ilisserusiatut illersorneqarnissaannik nalunaarutigineqarneq ajorput naartunik (qaammataanni siullerni) suliffissuarni imaluunniit niuerpalaartumik siunertaqarluni atuinerit.

§ 5. Pilersitatut nalunaarsorneqarsinnaassagaanni, pilersitaq qinnuteqaatip ulloq tunniunneqareerfissaa sioqqullugu nalunnginneqartunit nutaajunerusariaqarpoq, ersarissumillu allaassuteqassalluni.

Imm. 2. Nalunnginneqartutut isigineqartarput sulluunniit, nalinginnaasut aqqutigalugit allakkatigut, oqalugiaatikkut, atuinikkut imaluunniit periutsit allat aqqutigalugit pissarsiarineqarsinnaasut. Assigisaanik nioqqusiatut nutaatut illersorneqarnissamik qinnuteqaatip imaluunniit ilisserusiatut qinnuteqaatip imaa, Danmarkimi atuuttut tunniunneqarsimasoq ulloq ilisserusiatut qinnuteqaatip tunniutereerfissaa sioqqullugu, nalunnginneqartutut isigineqartarpoq, qinnuteqaat taanna tamanit pissarsiarineqarsinnaanngorsimappat nioqqusiamik nutaamik illersuinissaq pillugu inatsimmi § 22-mi malittarisassat naapertorlugit aamma inatsisip taassuma § 24-a. Imm. 1-imili pilersitap nalunnginneqartunit immikkoorteqangaatsiarnissaanik piumasaqaat, qinnuteqaatit taamaattut imarisaannut tunngatillugu atuutinngilaq.

Imm. 3. Taamaattorli pilersitamut ilisserusiatut nalunaarsorneqarneq pissarsiarineqarsinnaavoq, apeqqutaatinnagu qinnuteqaammik tunniussivissaq sioqqullugu qaammatit arfinillit iluanni tamanit pissarsiarineqarsinnaanngorsimanersoq, tamanna makku kingunerisimappasuk

- 1) ersittumik atornerluineq qinnuteqartumut imaluunniit inummut, piginnaatitaassutaannut attuumassuteqartumut atatillugu, imaluunniit
- 2) qinnuteqartoq imaluunniit inuk, piginnaatitaaffimmut attuumassuteqartoq, pisortatigoortumik imaluunniit pisortatigoortumik akuerineqarsimasumik nunat tamat akornanni

saqqummersitsinermi pilersitamik takutitsisimappat, Parisimi nunat tamat akornanni saqqummersitsineq pillugu isumaqatigiissut 22. november 1928-meersumi pineqartutut.

§ 6. Ilisserusiap nalunaarsorneqarnerani kismaassisussaataanerup nassataraa, allat ilisserusiap nalunaarsorneqarneranik piginnittuunngitsut ilisserusiap nalunaarsorneqarneranik piginnittumit akuerineqartigatik pilersitamik atueqqusaannginnerat pilersitamik, ilisserusiatut nalunaarsorneqarsimasumik sanallutik, tunisillutik, nioqqutiginnilerlutik imaluunniit atuillutik, ilisserusiatut nalunaarsorneqarsimasumik, imaluunniit tunisiamik nunamut eqqussillutik imaluunniit taamatut siunertaqarlutik pigisaqarlutik.

Imm. 2. Taamatullu kismaassisussaataanerup nassataraa, inuit ilisserusiap nalunaarsorneqarneranik piginnittuunngitsut ilisserusiap nalunaarsorneqarneranik piginnittumit akuerineqartigatik pilersitamik atueqqusaannginnerat, allanut, tunniussillutik imaluunniit neqerooruteqarlutik, pilersitamik atuinissaminnut piginnaatitaanngitsunut, nunami maani taamaaliornissaannut atortussalernerisigut, taakku atortut pilersitap ilaanik annertuumut tungassuteqarpata aamma nioqqutissamik tunniussuisup imaluunniit neqerooruteqartup nalunngippagu, imaluunniit pissutsit malillugit nalunaarunnaarsippasuk, taakku taamatut atorneqarnissamut atorneqarsinnaasut. Atortoq tunisassiami nalinginnaasumiittuuppat nioqqutaalluni, tamanna taamaallaat atuuppoq, atortumik tunniussisoq imaluunniit tunniussinissamik neqerooruteqartoq, tiguisussamut imm. 1-imi taaneqartutut iliuuseqaqullugu kajumissaarisimappat. Aalajangersakkanik 1. aamma 2. pkt.-imi atuinermi inuit imm. 3, nr. 1, 3 imaluunniit 4 taaneqartunik iliuuseqartut pilersitamik atuinissaminnut piginnaatitaanngitsutut isigineqarput.

Imm. 3. Kismaassisussaataanermut ilaanngillat

- 1) iliuuseqarnerit, inuussutissarsiutiginnissaat siunertarinagu suliarineqartut,
- 2) pilianut tunngatillugu iliuuseqarnerit, ilisserusiap nalunaarsorneqarneranik piginnittumit imaluunniit taassuma akuersissutaa atorlugu nunami maani imaluunniit nunami allami Det Europæiske Økonomiske Samarbejdet (EØS) iluani tunisaalersitsineq,
- 3) iliuuseqarnerit, ilisserusiap nalunaarsorneqarsinnaanermut peqqutaanik misileraatiginissaat siunertaralugu suliarineqartut, imaluunniit
- 4) nakorsaataarniarfimmi nakorsamit allagartaq malillugu nakorsaattissamik piareersaaneq, ataasiaannartumik pisoq imaluunniit iliuutsit, taamaalillugu nakorsaammik sananermut tunngasut.

§ 7. Illersorneqarneq, atortumut biologiskiusumut pilersitamut atasoq, pilersitaanera pissutaalluni aalajangersimasumik piginnaasaqartumut, atortunut biologiskiusunut tamanut atorpoq, tassanga atortumit biologiskiusumit assileqqillugu suliarineratigut imaluunniit kingunissaliorneranit ilusaata asseqqinnaavanik imaluunniit ilusaa allanngorartillugu pilersinneqarsimasumut, aamma assigisaanik pisinnaaneqartut.

Imm. 2. Illersorneqarneq, piliamut ilisserusiap nalunaarsorneqarneranut atasoq, paasissutissanik genetiskiusunik imaqartumut imaluunniit taakkunaneersumit, atortunut tamanut atorpoq, tassani piliaq akuuppat, tassanilu paasissutissat genetiskiusut iluaniippata ingerlatassatillu suliaralugit, takuulli § 3.

Imm. 3. Imm. 1 aamma 2 malillugit illersorneqarnermi ilaanngillat atortut biologiskiusut, sananeqarsimasut atortup biologiskiusup assileqqillugu suliarineratigut imaluunniit kingunissaliorneratigut, naalagaaffiup ilaasortaasup susassaqrifiata iluani imaluunniit Kalaallit Nunaanni nioqqutigineqartut ilisserusiap nalunaarsorneqarneranik piginnittumit imaluunniit taassuma akuersissutaanik peqartumit, taassuma assileqqillugu suliarinerata sananeqarnerani imaluunniit kingunissaliornerani ilaata atorneqarnerani pisariaqavissutut suliarineqarsimappat,

taassuma atortup biologiskiusup nioqqutigineqarnerani, naatsorsuutigereerlugu atortoq sananeqartoq malitsigisaanik suli kingunissalioqqinnissamut imaluunniit kingunissaliornissaanut atorneqassanngitsaq.

§ 8. § 7, imm. 1 aamma 2 apeqqutaatinnagit, naasut kingunissaliornermut atortuinik tunisaqarneq imaluunniit allatut ilusilimmik tuniniaanissamik suliniuteqarneq nassataqarpoq, ilisserusiap nalunaarsorneqarneranik piginnittumit imaluunniit taassuma akuersissutaanik peqartumit ingerlanneqartoq, nunaateqarnermik ingerlatsisumut siunertanut nunalerinermut tunngasunut, nunaateqarnermik ingerlatsisup naatitaminit pissarsiat nammineq ingerlatsivimmini assileqqillugit suliarinerinut imaluunniit kingunissaliortitsinermut atuissaguni nammineq akuersissummik peqarnissaa, taamaaliornermulli annertussusissat aamma atugassarititaasut allanneqarsimapput EF-imi immikkoortukkaat illersorneqarnissaat pillugu Rådep peqqussutaani artikel 14-imi?

Imm. 2. § 7, imm. 1 aamma 2 apeqqutaatinnagit, uumasut kinguaassiortitat imaluunniit atortut allat assileqqillugit suliarineratigut pinngortitanik uumasuneersunik tunisaqarneq imaluunniit allatut ilusilimmik tuniniaanissamik suliniuteqarneq nassataqarpoq, ilisserusiap nalunaarsorneqarneranik piginnittumit imaluunniit taassuma akuersissutaanik peqartumit ingerlanneqartoq, nunaateqarnermik ingerlatsisumut, nunaateqarnermik ingerlatsisoq uumasup atornissaanut imaluunniit atortup allap assileqqillugu suliarineratigut pinngortitanik uumasuneersunik siunertanut nunalerinermut tunngasunut nammineq akuersissutaateqassasoq, kisianni tassunga atatillugu tuniniaassanngitsaq imaluunniit aningaasarsiutinissaa siunertaralugu assileqqillugu suliarissanngikkaa. Økonomi- og erhvervsministeri nunaateqarnermik ingerlatsisut taamaattunik ilisserusianik nalunaarsorneqarsinnaasunik namminneq nunalerinerminni siunertanut atuinerannut annertussusissaq aamma atugassarititaasut pillugit aalajangersakkanik aalajangiisaaq.

§ 9. Inuk, ilisserusiap nalunaarsorneqarnissaanik qinnuteqaat tunniunneqarmat, nunami maani pilersitamik inuussutissarsiutitut atuisoq, apeqqutaatinnagu ilisserusiaq nalunaarsorneqarsimanersoq atuinerminik ingerlatsiinnarsinnaavoq taassuma nalinginnaasumik ilisarnaatai attatiinnarlugit, atuneq qinnuteqartumut imaluunniit inummit, piginnaatitaaffimmuut attuumassuteqartumut tunngatillugu atornerluinerunngippat. Taamatut piginnaatitaaffeqarneq aamma pineqartarpoq assigisaanik atugassartaqarluni inummit, nunami maani pilersitamik inuussutissarsiutitut atuinnaminut annertuumik iliuuseqarsimasumut.

Imm. 2. Imm. 1-imi piginnaatitaaffik pineqartoq taamaallaat allanut ingerlateqqinneqarsinnaavoq ingerlatsivimmuut, pinngorfigisaanut, imaluunniit atorneqarfissaatut siunniunneqarfianut peqatigitillugu.

§ 10. Apeqqutaatinnagu pilersitaq ilisserusserusiatut nalunaarsorneqarsimanersoq, ilisserusiap nalunaarsorneqarsimaneranik piginnittuunngitsut pilersitaq atorsinnaavaat aqqusinikkut angallammi nunamit allameersumi, imaatigut angallammi imaluunniit silaannakkut angallammi atortut pineqartut maaniikkallarnerini imaluunniit nalaatsornikkut maaniinnerini atuinerminni.

Imm. 2. Økonomi- og erhvervsministeri aalajangiisinnaavoq, taartissamaatit immikkuualuttortaasa aamma silaannakkut angallatinut atortut ilisserusiatut nalunaarsorneqarsimanerat apeqqutaatinnagu nunamut eqqunneqarsinnaanersut atorneqarlutillu silaannakkut angallatit naalagaaffimmi takornartami angerlarsimaffeqartut iluarsaannerini, danskit silaannakkut angallataasa assinganik piginnaatitaaffeqarnissaannik akuersaarinnittuusunut.

§ 11. Pilersitap ilisserusiatut nalunaarsorneqarnissaanik qinnuteqaat, siusinnerusukkuut nioqqusiap nutaatut illersorneqarnernissaanik qinnuteqaammi imaluunniit nunami maani ilisserusiat nalunaarsorneqarnerannut tunngasoq imaluunniit isumassarsiortartutut allagartamut, nioqqusiat

nutaatut illersorneqarnerannut imaluunniit ilisserusiat illersorneqarnerannut tunngasoq nunami, suliffissuaqarnermut tunngatillugu piginnittussaassuseqarnermik illersuinissaq pillugu Parisimi isumaqatigiissut 20. marts 1883-imeersumut ilaasumi, § 5, imm. 1 aamma 2, kiisalu § 9-mut tunngatillugu qinnuteqaatigineqarpata siusinnerusukkut qinnuteqaatigisimasamut peqatigitillugu tunniunneqarsimasutut naatsorsuunneqassaaq, siusinnerpaamik ulloq qinnuteqareerfissaq qaammatinik 12-inik sioqqullugu qinnuteqaammi nalunaarneqarsimasoq. Assigisaanik tulleriaarinermi salliutinneqarsinnaatitaanermut atuuppoq, naak illersorneqarnissamik qinnuteqaat nunamit, isumaqatigiissummut attuumassuteqanngitsumit pigaluartoq, assinganik tullieriaarinermi salliutinneqarnissamik Danmarkimi nioqqusiap nutaatut illersorneqarnissaanut qinnuteqaammi imaluunniit ilisserusianut qinnuteqaammi, nunat illugiillutik niueqatigiinnissamik isumaqatigiissutaat imaluunniit nunat amerlasuut akornanni isumaqatigiissut tunngavigalugu nunami tassani akuersaarneqarpata, siusinnerusukkut qinnuteqaatip tunniunneqarfigisaani, aamma tamanna pisimappat piumasaqaatit kingunerititaasullu annertunersaat, isumaqatigiissummut naapertuuttuuppata.

Imm. 2. Økonomi- aamma erhvervsministeri taamatut tulleriaarinermi salliutinneqarsinnaatitaanerup atuutilernissaanut atugassaritaasunik ersarinnerusunik aalajangersaassaaq.

§ 12. Qinnuteqartoq siusinnerusukkut nioqqusiap nutaatut illersorneqarnissaanik qinnuteqaammik Danmarkimi atuuttumik tunniussinikuusimappat, qinnuteqartup nioqqusiap nutaatut illersorneqarnissaanik qinnuteqaat tamarmiutillugu imaluunniit ilaannakortai tassunga aamma pilersitaasumut tunngatillugu ilisserusiap nalunaarsorneqarnissaanik qinnuteqaammini atorsinnaavaa. Qinnuteqartup, ulloq tunniussereerfissaq nioqqusiap nutaatut illersorneqarnissaanik qinnuteqaammut atuuttoq, aamma ilisserusiap nalunaarsorneqarnissaanik qinnuteqaammut atuutissanera qinnuteqaatigisinnaavaa. Tulleriaarinermi salliutinneqarnissaq nioqqusiap nutaatut illersorneqarnissaanik qinnuteqaammi piumasarineqarsimappat, tak. nioqqusiamik nutaamik illersuinermit inatsimmi § 6, aamma taanna piumasarineqarsimasoq ilisserusiap nalunaarsorneqarnissaanik qinnuteqaammut atuutissaaq.

Imm. 2. Imm. 1 malillugu qinnuteqaateqarnermut malittarisassanik økonomi- og erhvervsministeri aalajangersaassaaq.

Kapitali 2

Ilisserusiap nalunaarsorneqarnissaanik qinnuteqaatit taakkulu suliarineqartarnerat il.il.

§ 13. Nunami maani nioqqusiat nutaatut illersorneqarnerannut tunngasunut oqartussaasuvoq Patent- og Varemærkestyrelsen, pisortanit, aamma Ankenævnet for Patenter og Varemærkerimit (Patentankenævnet) aqunneqartoq. Nioqqusiat nutaatut illersorneqarnerannut tunngasunut oqartussat matumani inatsimmi paasineqassaaq nunami maani nioqqusiat nutaatut illersorneqarnissaanut tunngasunut oqartussat, allat nalunaarneqarsimangippata.

§ 14. Ilisserusiap nalunaarsorneqarnissaanik qinnuteqaat Patent- og Varemærkestyrelsimut, nalunaarsuinermit tunngasunut oqartussaasuusumut tunniunneqassaaq. Qinnuteqaat suup illersorneqartikkusutap nalunaarneranik imaqassaaq. Qinnuteqarnermut akiliutaasartumik akiliisoqassaaq.

Imm. 2. Qinnuteqaammi pilersitaq ima ersaritsigisumik allaaserineqassaaq imaluunniit takutinneqassaaq, suliamut immikkut ilisimasallip taanna najoqqutaralugu suliarisinnaassallugu.

Imm. 3. Qinnuteqaat pilianut periuseq mikrobiologiskiusoq atorlugu pilersitamut attuumassuteqarpat, qinnuteqaammi taamaallaat ersarissuseq naammattumik nalunaarneqarsimasutut isigineqassaaq, § 15, imm. 1 aamma 2-mi piumasaqaatit aamma eqquutinneqarsimappata.

§ 15. Pilersitap suliarinerani atortut biologiskiusut atorneqassappata, nalinginnaasumik pissarsiarineqarsinnaanngitsut imaluunniit qinnuteqarnermi allagartap uppersaataani ima allaaserineqarsinnaanatik, suliamik ilisimasallip taakku najoqqutaralugit pilersitamik suliaqarsinnaanani, taava atortumit biologiskiusumit misiliut toqqorneqassaaq kingusinnerpaamik ulloq taanna, qinnuteqaatip tunniunneqarnerani. Tamatuma kingorna misiliut ingerlaannartumik toqqortarineqassaaq, taamaalilluni misiliut Danmarkimi tiguneqarsinnaassalluni.

Imm. 2. Misiliut toqqorneqarsimasoq atorneqarsinnaajunnaaraangat, imaluunniit allat pissutaallutik misiliut tunniunneqarsinnaanngippat, taassuma assinganik atortumik biologiskiusumik misiliummik nutaamik taarserneqassaaq piffissaliunneqartup iluani aammalu malittarisassat naapertorlugit, økonomi- og erhvervsministerimit aalajangerneqarsimasut. Nutamik toqqorsineq suliarineqarsimasutut isigineqassaaq, ullormi tassanga siusinnerusukkut toqqorsinerup pinerani pisimasutut.

Imm. 3. Økonomi- og erhvervsministeri imm. 1 aamma 2 malillugu toqqorsinermut tunniussinermullu malittarisassanik aalajangersaasaaq.

§ 16. Qinnuteqaammi ataatsimi ilisserusiat nalunaarsorneqarnissaanik immikkoortunik marlunnik imaluunniit arlalinnik pilersitanik imminnut ataqatigiinngitsunik qinnuteqartoqassanngilaq.

§ 17. Pilersitap ilisserusiatut nalunaarsorneqarnissaa qinnutigineqarpat, siusinnerusukkut qinnuteqartup ilisserusiatut nalunaarsorneqarnissaanik qinnuteqaammi tunniussimasaaniittoq, suli inaarutaasumik nioqqusiat nutaatut illersorneqarnissaanut tunngasunut oqartussanit aalajangiiffigineqarnikuunngitsoq, qinnuteqartup qinnuteqaateqarneratigut kingulliullugu qinnuteqaat isigineqassaaq tunniunneqarsimasutut piffissami tassani, uppersaatait, pilersitap allanneqarnera, nioqqusiat nutaatut illersorneqarnissaat pillugu oqartussanit tiguneqarneranni. Økonomi- og erhvervsministeri tamatumunnga malittarisassanik aalajangersaasaaq.

§ 18. Ilisserusiap nalunaarsorneqarnissaanik qinnuteqaat allangortinneqassanngilaq imaalillugu, qinnuteqaat tunniunneqarmat qinnuteqaammi ilaannngitsut qinnutigineqarlutik.

§ 19. Nioqqusiat nutaatut illersorneqarnissaat pillugu oqartussat nakkutigissavaat, qinnuteqaammi §§ 1, 2, 3, 4, 16 aamma 18-imi piumasaqaatit eqquutinneqarnersut.

Imm. 2. Qinnuteqartup akiliutaasartumik akiliinermigut Patent- og Varemærkestyrelsi aamma qinnuigisinnaavaa nakkutigeqqullugu, pilersitap nutaajunissaanik aamma nalunnginneqareersunit ersarissumik allaassuteqarnissaanik pillugu piumasaqaatit eqquutinneqarnersut, tak. § 5.

§ 20. Nioqqusiat nutaatut illersorneqarnissaat pillugu oqartussat isumaqarpata, qinnuteqaat najoqqutassat malillugit pisimanngittoq, tamanna pillugu qinnuteqartoq ilisimatinneqassaaq kajumissaarneqarlunilu ersarinnerusumik piffissaliunneqartoq qaangiutsinnagu oqaaseqaateqaqqullugu imaluunniit qinnuteqaat iluarsissuteqarfigeqqullugu.

Imm. 2. Qinnuteqaat unitsinneqassaaq, qinnuteqartoq piffissaliunneqartoq qaangiutsinnagu qinnuteqaammut oqaaseqaateqaanngippat imaluunniit iluarsiinissaminut iliuuseqaanngippat. Imm. 1 malillugu qinnuteqartumut ilisimatitsissut tamanna pillugu paasissutissanik imaqaasaaq.

Imm. 3. Qinnuteqaat suliarineqaqqilissaaq, qinnuteqartoq piffissaliunneqarsimasup kingorna qaammatit 2-t qaangiutsinnagit qinnuteqaammut oqaaseqaateqarpat imaluunniit iluarsiinissaminut iliuuseqarpat suliarineqaqqilerneranullu akiliutaasartoq aalajangerneqarsimasooq akilerlugu.

Imm. 4. Imm. 1- 3-mi aalajangersakkat assinganik atuupput, qinnuteqartoq § 19, imm. 2 naapertorlugu piumasaaqarpat, pilersitap nutaajunissaa nalunnginneqareersunillu ersarissumik allaassuteqarnissaa pillugu piumasaaqaatit eqquutinneqarnersut aamma Patent- og Varemærkestyrelsen nakkutigissagaa.

§ 21. Qinnuteqarnermi najoqqutassat naapertorlugit pisoqarsimappat, pilersitaq nalunaarsorneqassaaq. Ilisserusiap nalunaarsorneqarneranik nalunaarut Patent- og Varemærkestyrelsenimit tamanut saqqummiunneqassaaq.

Imm. 2. Nioqqusiat nutaatut illersorneqarnissaat pillugu oqartussat qinnuteqaatip ilalernerneqarnissaanut ajoqutaasumik nassaarpata, aamma qinnuteqartoq ajoqutaasooq pillugu oqaaseqaateqarnissaminut periarfissaqarnikuusimappat, qinnuteqaat itigartinneqassaaq, nioqqusiat nutaatut illersorneqarnissaat pillugu oqartussat isumaqaanngippata tunngavissaqarlutik qinnuteqartumik § 20 malillugu oqaaseqaateqarnissaanik imaluunniit iluarsiissuteqarnissaanik kajumissaarinissaminut.

§ 22. Inuit arlaat nioqqusiat nutaatut illersorneqarnissaat pillugu oqartussanut, qinnuteqarsimasooq pinnani nammineq pilersitamut pisinnaatitaaffeqartuunerarpat, nioqqusiat nutaatut illersorneqarnissaat pillugu oqartussat, apeqqut nangaanartoqartikkunikku, pineqartoq kajumissaarsinnaavaat piffissap ersarinnerusumik nalunaarutigineqartup iluani tamanna pillugu eqqartuussivimmut suliakkiissuteqaqqullugu. Kajumissaarineq malinneqaanngippat, akerliliilluni oqaaseqaatigisimasaaq ilisserusiap nalunaarsorneqarnissaa pillugu qinnuteqaatip aalajangiiffigineqarnerani naatsorsuutaajunnaassaaq. Tamanna pillugu ilisimatitsissuteqarneq kajumissaarinermi pissaaq.

Imm. 2. Pilersitamut pisinnaatitaaffeqarneq pillugu eqqartuussivimmut suliakkiisoqarpat, ilisserusiap nalunaarsorneqarnissaanik qinnuteqaatigineqartumut, ilisserusiap nalunaarsorneqarnissaanik qinnuteqaammik suliaqarneq unitsikkallarneqassaaq, eqqartuussivimmi suliap inaarutaasumik aalajangiiffigineqarnissaata tungaanut.

§ 23. Inuit arlaata nioqqusiat nutaatut illersorneqarnissaat pillugu oqartussanut qularnarunnaarsitsippagu, qinnuteqarsimasooq pinnani pineqartorli pilersitamut pisinnaatitaaffeqartoq, nioqqusiat nutaatut illersorneqarnissaat pillugu oqartussat qinnuteqaat pineqartumut nuussavaat, taassuma tamanna qinnuteqaatigippagu. Inuk taanna taamatut ilisserusiap nalunaarsorneqarneranik nuutsivigineqartoq, qinnuteqarnermut akiliutaasartumik nutaamik akiliuteqassaaq.

Imm. 2. Ilisserusiap nalunaarsorneqarnissaanik qinnuteqaatip nuunneqarnissaa qinnuteqaatigineqarpat, qinnuteqaat unitsinneqassanngilaq, itigartinneqassanngilaq imaluunniit akuerineqassanngilaq, qinnuteqaatigineqarsimasooq inaarutaasumik aalajangiiffigineqartinnagu.

§ 24. Pilersitaq siusinnerpaamik nalunaarsorneqassaaq qinnuteqaatip ulloq tunniunneqareerfissaaniit qaammatit 15-it kingorna imaluunniit, tulleriiarinermi salliutinneqarnissaaq qinnutigineqarsimappat, ulloq tulleriiarinermi salliutinneqarfiusumiit, tak. § 11.

Imm. 2. Ilisserusiap nalunaarsorneqarnissaanik qinnuteqartup qinnuteqaateqarneratigut pilersitamik qinnuteqaatip imaluunnit nalunaarsuinerup atuagaartaliornera piaarnerusumik pisinnaavoq.

Imm. 3. Ulloq qinnuteqaammik tunniussereerfissamiit qaammatit 15-it ingerlareerpata imaluunniit, tulleriiaarinermi salliutinneqarnissaq qinnutigineqarsimappat, ulloq tulleriiaarinermi salliutinneqarfiusumiit, naak sulii pilersitaq nalunaarsorneqanngikkaluartoq, allagartat tamanut pissarsiarineqarsinnaanngortinneqassapput. Unitsitsinissamik imaluunniit itigartitsinissamik aalajangiisoqarsimappat, allagartat tamanit pissarsiarineqarsinnaanngortinneqassanngillat, qinnuteqartoq suliap aallarteqqinneqarnissaanik qinnuteqaateqarsimangippat, itigartitsinermik nalunaarut naammagittaalliuutigisimangippagu imaluunniit §§ 66 imaluunniit 67 naapertorlugu piginnaatitaaffimmi pilerseqqinneqarnissaannik qinnuteqaateqarsimangippat.

Imm. 4. Imm. 2 imaluunniit 3 naapertorlugu allagartat pissarsiarineqarsinnaanngorpata, tamanna pillugu nalunaarusiortoqassaaq.

Imm. 5. Uppernarsaat niuernermi isertuussanik imaqarpat, pilersitamut tunngassuteqanngittunik, ilisserusiap nalunaarsorneqarnissaanut qinnutigineqartumut imaluunniit ilisserusiatut nalunaarsorneqarsimasumut, nioqqusiat nutaatut illersorneqarnissaat pillugu oqartussat, immikkut peqqutissaqartoqarpat, qinnuteqaateqarfigineqarnermik kingorna aalajangersinnaavaat, uppernarsaat tamarmiulluni imaluunniit ilaannakuulluni pissarsiarineqarsinnaassanngitsaq. Qinnuteqaat taamaattoq tunniunneqarsimappat, uppernarsaat pissarsiarineqarsinnaasunngortinneqassanngilaq, aalajangiisoqartinnagu, imaluunniit piffissami, aalajangiinermik naammagittaalliortoqarsinnaatillugu. Naammagittaalliuut ingerlaannaq atuutilertarpoq.

Imm. 6. Misiliut atortuuppat biologiskiusoq § 15, imm. 1 naapertorlugu toqqorneqarsimasooq, kinaluunniit atortumik misiliummik pissarsisinnaatitaavoq, allagartat imm. 3 naapertorlugu pissarsiarineqarsinnaasunngortinneqarpata. Ilisserusiap nalunaarsorneqarnerata kingorna kimulluunniit tunniussisoqarsinnaavoq, tamatuminnga piumasumut, apeqqutaatinnagu ilisserusiap nalunaarsorneqarsimanera atorunnaarsimanersoq imaluunniit atortussaatinneqarsimanginnersooq. Tamatumali kingunerissanngilaa, misiliutip tunniunneqarnissaa, inummut aalajangersakkat malillugit imaluunniit inatsit naapertorlugu atortumik toqqorneqarsimasumik tigummiqartussaangitsumut. Aamma misiliut tunniunneqassanngilaq inummut, atortup navianarsinnaanera pissutigalugu isumaqartoqarpat ersarissamik ulorianartortaartoq, inuup taassuma misiliummik tigumiarnissaa.

Imm. 7. Imm. 6 apeqqutaatinnagu qinnuteqartoq qinnuteqaateqarsinnaavoq, misiliummik tunniussineq piffissami, ilisserusiap nalunaarsorneqarnissaata tungaanut, taamaallaat pisinnaasoq suliamik immikkut ilisimasaqartumut. Qinnuteqaat itigartinneqarsimappat, utertinneqarsimappat imaluunniit utertinneqarsimasutut naatsorsuutigineqarpat, qinnuteqartup qinnuteqaatigisinnaavaa, atortumit toqqorneqarsimasumit misiliutip ukiuni 10-ni ilisserusiap nalunaarsorneqarnissaanik qinnuteqaatip tunniunneqarneraniit, taamaallaat tunniunneqarsinnaasoq suliamut immikkut ilisimasalimmut.

Imm. 8. Økonomi- og erhvervministeri tunniussisoqarnissaanik qinnuteqaammik saqqummiussisarneq pillugu, taamaattunik qinnuteqaateqarnermut saqqummiussinissamut piffissaliussat pillugit aamma kina suliamut immikkut ilisimasaqartut atorneqassanersoq pillugu aalajangersakkanik aalajangersaassaaq.

Imm. 9. Misiliummik tunniussisoqarnissaanik qinnuteqaateqarneq nioqqusiat nutaatut illersorneqarnissaat pillugu oqartussanut saqqummiunneqassaaq aamma misiliummik atugaqarnermi killilersuutit maluginiarnissaat pillugu uppernarsaanermik imaqassaaq, malittarisassani allanneqarsimasut, økonomi- og erhvervsministerimit aalajangerneqarsimasut. Misiliut suliamut immikkut ilisimasalimmut tunniunneqassappat, uppernarsaaneq taassumanga tunniunneqassaaq.

§ 25. Patent- og Varemærkestyrelsen ilisserusiap nalunaarsorneqarnissaanik qinnuteqaammut inaarutaasumik aalajagiineranut naammagittaalliuut qinnuteqartumit Ankenævnet for Patenter og Varemærker-imut tunniunneqassaaq. Ilisserusiap nalunaarsorneqarneranik piginnittumut assinganik

atuuppoq, ilisserusiap nalunaarsorneqarsimanera tamarmiulluni imaluunniit ilannaakortaa atorunnaarsinneqarpat § 50 naapertorlugu nalunaarsorsimaneqarnerup misilinneqaqqinnissaanik qinnuteqartoqarnerata kingorna. Ilisserusiap nalunaarsorsimaneqarnera attatiinnarneqarpat ilusaa allannqortillugu imaluunniit allannqortinnagu piumasatoqaraluartoq, aalajangiineq naammagittaalliuutigineqarsinnaavoq inummit, piumasaqarnerminik saqqummiussisumit. Kingulliullugu taaneqartup naammagittaalliuutini utertikkaluarpaguluunniit, naammagittaalliuut misilinneqarsinnaavoq, tamatumunnga immikkut tunngavissaqartoqarpat.

Imm. 2. Imm. 1 malillugu naammagittaalliuut Ankenævnet for Patenter og Varemærker-imit tunniunneqassaaq, Patent- og Varemærkestyrelsen aalajangiineq pillugu pineqartumut ilisimatitsineraniit kingusinnerpaamik qaammatit 2-t kingorna. Piffissaliunneqartumi tassani tamatumunnga akiliut aalajangerneqarsimasoq akilerneqassaaq. Tamanna pinngippat naammagittaalliuut itigartinneqassaaq.

Imm. 3. Allat, aalajangiinermut pineqartumut soqutigisaqartut, aalajangiinerup saqqummiunneqarneraniit kingusinnerpaamik qaammatit 2-t kingorna, naammagittaalliummik taamaattumik tunniussisinnaapput.

Imm. 4. Ankenævnet for Patenter og Varemærker-ip aalajangiineri aqutsisutut oqartussanut allanut tunniunneqarsinnaanngillat.

Imm. 5. Patent- og Varemærkestyrelsen aalajangiineri, Ankenævnet for Patenter og Varemærker-imit ingerlateqqinneqarsinnaasut, eqqartuussivinnut ingerlateqqinneqarsinnaanngillat, ankenævni aalajangiinera pitinnagu. Ankenævnet for Patenter og Varemærker-imit aalajangerneqarsimasoq, eqqartuussivinnut ingerlateqqikkusukkaanni, pineqartumut aalajangiineq ilisimatitsissutigineqarneraniit, suliaq kingusinnerpaamik qaammatit 2-t ullormit ilisimatinneqarnermiit suliaq kingusinnerpaamik qaammatit 2-t ullormit.

Imm. 6. Aalajangiinerit, § 24, imm. 5 naapertorlugu niuernermit isertuussanik isertuussinissamik qinnuteqaaterit itigartitaanerini, naammagittaalliuutigineqarsinnaapput, inummit qinnuteqaateqarsimasumit.

Kapitali 3

Nunat tamat akornanni ilisserusiap nalunaarsorneqarnissaanik qinnuteqaat

§ 26. Nunat tamat akornanni ilisserusiap nalunaarsorneqarnissaanik qinnuteqaat tassaavoq Washingtonimi ulloq 19. juni 1970-imi nioqqusiat nutaatut illersorneqarnissaat pillugu suleqatigiinnissamut aalajangersagaliarineqarsimasoq naapertorlugu qinnuteqaat.

Imm. 2. Nunat tamat akornanni ilisserusiap nalunaarsorneqarnissaanik qinnuteqaat nioqqusiat nutaatut illersorneqarnissaat pillugu oqartussanut imaluunniit nunat tamat akornanni kattuffimmut, aalajangersagaliaq aamma suliarinissaanut najoqqutassiat naapertorlugit qinnuteqaammik taamaattumik tigusaqarnissaminut pisinnaatitaaffeqartunut tunniunneqassaaq (oqartussat tigooraaviat). Nunat tamat akornanni ilisserusiap nalunaarsorneqarnissaanik qinnuteqaat nunami maani nioqqusiat nutaatut illersorneqarnissaat pillugu oqartussanut tunniunneqarsinnaavoq, malittarisassat, økonomi- og erhvervsministerimit aalajangerneqarsimasut malillugit. Qinnuteqartoq nioqqusiat nutaat illersorneqarnissaat pillugu oqartussanut qinnuteqaammik akiliiummik aalajangersarneqarsimasumik akiliissaaq.

Imm. 3. §§ 27-35-imi aalajangersakkat nunat tamat akornanni ilisserusiat nalunaarsorneqarnissaanik qinnuteqaatinut atuutissapput, Danmarkip ilaaffigisaanut.

§ 27. Nunat tamat akornanni ilisserusiap nalunaarsorneqarnissaanik qinnuteqaat, oqartussanit tiguisussanik nunat tamat akornanni ullormik tunniussereerfissamik aalajangiisimasunut, nunami

maani nioqqusiap nutaatut illersorneqarnissaanik qinnuteqaammik tunniussinissamut ullormi pineqartumi tunniussineq assinganik atuuppoq. Taamaattorli § 5, imm. 2, 2. pkt-imi aalajangersagaq taamaallaat atuuppoq qinnuteqaat § 29 naapertorlugu ingerlateqqinneqarsimappat.

§ 28. Nunat tamat akornanni ilisserusiap nalunaarsorneqarnissaanik qinnuteqaat, utertinneqarsimasutut naatsorsuunneqassaaq Danmarkimut tunngatillugu pissutsini, nioqqusiat nutaatut illersorneqarnissaat pillugu suleqatigiinnissamut aalajangersagaliarineqarsimasup artikkeliani 24, imm. 1 (i) aamma (ii)-mi pineqartumi.

§ 29. Qinnuteqartup nunat tamat akornanni ilisserusiap nalunaarsorneqarnissaanik qinnuteqaat Danmarkimut ingerlateqqinneqarnissaa kissaatigiguniuk, nunat tamat akornanni ulloq tunniussereerfissamiit qaammatit 33-t qaangiutsinnagit imaluunniit, tulleriiarinerimi salliutinneqarnissaaq qinnuteqaatigineqarsimappat, salliutinneqarnissamut ulloq tunniussivissamiit akiliut aalajangerneqarsimasooq akilissavaa kiisalu nunat tamat akornanni qinnuteqaat danskisuunngortillugu nutsigaq, økonomi- og erhvervsministerip nutsertinniakkatut aalajangersimasaa, imaluunniit qinnuteqaat danskisut oqaasertaqarpat, qinnuteqaatip assilineri.

Imm. 2. Imm. 1-imi piffissaliullugu aalajangersimasooq qaangiutsinnagu akiliut aalajangersimasooq qinnuteqartumit akilerneqarsimappat, nutsernera imaluunniit assilineri piumasarineqarsimasooq tunniuneqarsinnaavoq piffissaliunneqaqqittumiit qaammatit 2-t qaangiutsinnagit, piffissaliunneqaqqittup qaangiutinnginnerani saniatigut akiliutissaq aalajangerneqarsimasooq akilerneqareerpat.

Imm. 3. Matumani paragraffimi piumasaqaatit qinnuteqartup eqquutinngippagit, Danmarkimut tunngatillugu qinnuteqaat utertinneqarsimasutut naatsorsuutigineqassaaq.

§ 30. § 29 naapertorlugu nunat tamat akornanni ilisserusiap nalunaarsorneqarnissaanik qinnuteqaat ingerlateqqinneqarpat, kapitali 1-imi aamma 2-mi aalajangersakkat qinnuteqaammut atuutissapput aamma suliarineqarnerani aallaanerussutai ilanngullugit, paragraffimi matumani aamma §§ 31 aamma 34-imi aalajangersarneqarsimasut. Qinnuteqaat taamaallaat suliassatut tiguneqarsinnaavoq § 29 naapertorlugu piffissaliunneqarsimasut atuuttut qaangiutsinnagit, tamanna qinnuteqartup qinnuteqaatigippagu.

Imm. 2. § 24, imm. 2 aamma 3-mi aalajangersakkat atuutissapput, qinnuteqaat suli ingerlateqqinneqanngikkaluartoq, qinnuteqartoq § 29 malillugu qinnuteqaatip nutsernerata tunniunnissaanut pisussaaffimminik eqquutitsisimappat, imaluunniit qinnuteqaat danskisut oqaasertaqarpat, qinnuteqartoq assilineranik nioqqusiat nutaatut illersorneqarnissaat pillugu oqartussanut tunniussereersimappat.

Imm. 3. §§ 41 aamma 43 – 45-mi aalajangersakkat atonerini, ilisserusiat pillugit paasissutissisussaataaneq pillugu § 53 aamma piffissami tunniussinerup nalunaarsuinerullu akornanni pilersitamik illersuinissaaq pillugu § 57 nunat tamat akornanni ilisserusiap nalunaarsorneqarnissaanik qinnuteqaat tamanit pissarsiarineqarsinnaanngorsimasutut naatsorsuutigineqartarpoq, imm. 2 naapertorlugu pissarsiarineqarsinnaanngoraangat.

Imm. 4. Ilisserusiap nalunaarsorneqarnissaanik qinnuteqaat ilusaanut aamma imarisaanut tunngatillugu nioqqusiat nutaatut illersorneqarnissaat pillugu aalajangersagaliami piumasaqaatinik eqquutitsippat, taamaatillugu akuersissutigineqassaaq.

§ 31. Nunat tamat akornanni ilisserusiap nalunaarsorneqarnissaanik qinnuteqaammik ilisserusiatut nalunaarsuisoqassanngilaq imaluunniit itigartitsisoqassanngilaq økonomi- og erhvervsministerimit piffissaliunneqarsimasutut aalajangerneqarsimasooq sioqqullugu, qinnuteqartup qinnuteqaammut sioqqutsilluni aalajangiinissaaq akuersissutigisimanngippagu.

§ 32. Nioqqusiat nutaatut illersorneqarnissaat pillugu oqartussat qinnuteqartoq akuersissuteqartinnagu nunat tamat akornanni ilisserusiap nalunaarsorneqarnissaanik qinnuteqaammut ilisserusiamik nalunaarsueqqusaanngillat imaluunniit tamanit pissarsiarineqarsinnaasunngortitsissanngillat, Verdensorganisationen for Intellektuel Ejendomsret-ip (WIPO) Det Internationale Bureau-anit tamanit pissarsiarineqarsinnaasunngortitsereersinnagu imaluunniit nunat tamat akornanni ulloq tunniussereerfissamiit qaammatit 20-t ingerlareertinnagit imaluunniit, tulleriiaarinermi salliutinneqarnissaq qinnuteqaatigineqarsimappat, tulleriiaarinermi salliutinneqartunut ulluliunneqartumiit.

§ 33. Nunat tamat akornanni ilisserusiap nalunaarsorneqarnissaanik qinnuteqaat nunat tamat akornanni piaareersaataasumik misilinneqarsimangippat, qinnuteqartup nunat tamat akornanni misiliinissamut oqartussat piumasaqaateqarnerisa kingorna ilisserusiamut piumasaqaatinik killiliisimappat, taava qinnuteqaammi ilaa pineqartoq nioqqusiat nutaatut illersorneqarnissaat pillugu oqartussanut utertinneqarsimasutut naatsorsuutigineqassaaq, qinnuteqartup akiliutaasartoq aalajangerneqarsimasoq akilinngippagu qaammatit 2-t qaangiutsinnagit, nioqqusiat nutaatut illersorneqarnissaat pillugu oqartussat tamatuminnaga qinnuteqarneranniit.

§ 34. Nunat tamat akornanni ilisserusiap nalunaarsorneqarnissaanik qinnuteqaatip ilaa nunat tamat akornanni nutaaliaanermut misissorneqarsimangippat imaluunniit nunat tamat akornanni piaareersaataasumik ilisserusiap nalunaarsorneqarsinnaassusaa misilinneqanngippat, qinnuteqaatip pilersitanik marlunnik imaluunniit arlalinnik imminnut atassuteqanngittunik ilaqartutut isigineqarnera pissutaalluni, aamma nioqqusiat nutaatut illersorneqarnissaat pillugu aalajangersagaliaq naapertorlugu qinnuteqartup tapiliussatut akiliutaasartoq aalajangerneqarsimasoq piffissaliunneqartup iluani akilersimangippagu, nioqqusiat nutaatut illersorneqarnissaat pillugu oqartussat misissussavaat, eqqortumik naliliisoqarsimanersoq. Taama pisoqarsimanera paasineqarpat, qinnuteqaatip ilaa pineqartoq nioqqusiat nutaatut illersorneqarnissaat pillugu oqartussanut utertinneqarsimasutut naatsorsuutigineqassaaq, qinnuteqartup akiliutaasartoq aalajangerneqarsimasoq akilinngippagu qaammatit 2-t qaangiutsinnagit, nioqqusiat nutaatut illersorneqarnissaat pillugu oqartussanit misissuinerup inerneru pillugu ilisimatinneqarnermi kingorna. Nioqqusiat nutaatut illersorneqarnissaat pillugu oqartussat isumaqarpat, naliliineq kukkusuusoq, qinnuteqaatip iluitsuutillugu suliarineqarnera nanginneqassaaq.

Imm. 2. Qinnuteqartup imm. 1 naapertorlugu aalajangiineq naammagittaalliuutigisinnaavaa, tassani isigineqarpat, ilisserusiap nalunaarsorneqarnissaanik qinnuteqaatip pilersitanik marlunnik imaluunniit arlalinnik imminnut atassuteqanngittunik ilaqartoq. § 25-mi naammagittaalliorsinnaaneq pillugu aalajangersakkat assinganik atuupput.

Imm. 3. Styrelsip aalajangiisimanera aalajangiunneqarpat, imm. 1 naapertorlugu akiliutaasartumik akiliinissamut piffissarititaasoq naatsorsorneqassaaq ullormit, inaarutaasumik aalajangiinerup pineraniit.

§ 35. Oqartussat tiguisussat nunat tamat akornanni ilisserusiap nalunaarsorneqarnissaanik qinnuteqaammut nunat tamat akornanni ullormik tunniussereerfissamik aalajangiinissaminut itigartitsippata, nioqqusiat nutaatut illersorneqarnissaat pillugu oqartussanut qinnuteqartup qinnuteqaateqarneratigut aalajangiineq eqqortuunersoq misileqqinneqassaaq. Assinganik atuuppoq Det Internationale Bureau-mit aalajangiineq, kingornatigut qinnuteqaat utertinneqarsimasutut isigineqassammat.

Imm. 2. Imm. 1 naapertorlugu nutaamik misiliisitseqqinnissaq pillugu qinnuteqaateqarnek Det Internationale Bureau-mut saqqummiunneqassaaq økonomi- og erhvervsministerimit

piffissaliullugu aalajangerneqarsimasup qaangiutinnginnerani. Økonomi- og erhvervsministeri piffissamik aalajangiisaaq aamma qinnuteqartup akiliutaasartumik akiliinermigut qinnuteqaatip nutserneranik nioqqusiat nutaatut illersorneqarnissaat pillugu oqartussanut tunniussinissaanut annertussusissaanik ersarinnerumik.

Imm. 3. Nioqqusiat nutaatut illersorneqarnissaat pillugu oqartussat isumaqarpata, oqartussat qinnuteqaammik tiguisut imaluunniit Det Internationale Bureau-ip aalajangiinera eqqortuunngitsaq, nioqqusiat nutaatut illersorneqarnissaat pillugu oqartussat kapitali 1 aamma 2 naapertorlugu qinnuteqaat suliarissavaat. Nunat tamat akornanni ulloq qinnuteqaammik tunniussivissaq oqartussanit tiguisussanit aalajangerneqarsimangippat qinnuteqaat tunniunneqarsimasutut naatsorsuutigineqassaaq ulloq taanna, nioqqusiat nutaatut illersorneqarnissaat pillugu oqartussat ulloq nunat tamat akornanni trunniussivissatut aalajangerneqarsimasussaagaluartutut isigisaanni. Qinnuteqaammi ilusaanut imaanullu tunngatillugu aalajangersagaliami piumasaqaatit eqquutinneqarsimappata, taamaatillugu akuerineqassaaq.

Imm. 4. § 5, imm. 2, 2.pkt-imi aalajangersagaq atuutissaaq qinnuteqaatinut, imm. 2 naapertorlugu suliarineqarnissamut tiguneqarsimasunut, § 24 naapertorlugu qinnuteqaat nalinginaasumik tamanit pissarsiarineqarsinnaanngorsimappat.

Kapitali 4

Europameersumik nioqqusiap nutaatut illersorneqarnissaanik qinnuteqaammik allanngortitsineq

§ 36. (Kalaallit Nunaanut atuutilersinneqanngilaq).

Kapitali 5

Nalunaarsuinerup annertussusaa aamma piffissaq atuuffia

§ 37. Ilisserusiap nalunaarsorneqarneranut illersorneqarnerata annertussusaa ilisserusiap nalunaarsorneqarnissaanut piumasaqaatitaanit aalajangerneqassaaq. Ilisserusiap nalunaarsorneqarnissaanut piumasaqaatit paasiniaraanni allaaserineranut aamma titartagartaanut ilitsersuut aaneqarsinnaavoq.

Imm. 2. Nalunaarsuinerup kingorna illersorneqarnerata annertussusaa ilaneqassanngilaq.

§ 38. Ilisserusiap nalunaarsorneqarnera ullormit tunniunneqarneraniit atuutissaaq ukiut 3-t angullugit akiliutaasartullu aalajangersimasup akilerneratigut nutarterneqarsinnaalluni piffissanik marlunnik ilallugu ukiunut 3-nut aamma 4-nut.

Imm. 2. Nalunaarsuinerup nutarterineq nalunaarutigineqartassaaq.

Kapitali 6

Nutarterinermut akiliutaasartunik akiliineq

§ 39. Nutarterinermut akiliutaasartoq akilerneqariisaaq qaammammi, akiliutaasartumut piffissap aallartinnerai. Nutarterinermut akiliutaasartoq ulloq akilerneqareerfissaa qaammatinik 3-nik sioqqullugu akilerneqarsinnaavoq.

Imm. 2. § 17-imi pineqartutut kingusinnerusukkut qinnuteqarnermi nutarterineranut akiliutaasartooq piffissanut taakkununga akilerneqareersimassaaq, aallartittunut ullut taakku sioqqullugit, kingusinnerusukkut qinnuteqaatip tunniunneqarnerani, imaluunniit qaammatinik 2-nik sioqqullugit aallartittoq, ullormilli taassumanga qaammatit 2-t ingerlareertinnagit. Nunat tamat akornanni ilisserusiap nalunaarsorneqarnissaanik qinnuteqaammut nutarterineranut akiliiffimmut akilerneqassaaq, aallartissimasumut ulloq taanna sioqqullugu, qinnuteqaatip § 29 malillugu ingerlateqqinneqarneranit imaluunniit § 35 malillugu suliarineqarnissamut tiguneqarneranit, imaluunniit aallartittoq qaammatit 2-t qaangiutsinnagit ullormit tassannga, ullormilli taassumanga qaammatit 2-t ingerlareertinnagit qinnuteqaatip ingerlateqqinneqarneraniit imaluunniit suliarineqarnissamut tiguneqarneraniit.

Imm. 3. Nutarterineranut akiliutaasartooq qaffassutaa ilanngullugu akilerneqarsinnaavoq akilerneqareerfissaaniit qaammatit 6-it kingorna.

Imm. 4. Patent- og Varemærkestyrelsi ilisserusiap nalunaarsorneqarnissaanik qinnuteqartumik, ilisserusiap nalunaarsorneqarneranit piginnittumik imaluunniit fuldmægtigimit toqqarneqarsimasumik nutarterineranut akiliutaasartumik akileeqqusisarpaq, kisianni Patent- og Varemærkestyrelsi pisussaangilaq akileeqqusissutit amigaataasut akilersinneqarnissaanut inuttaqartitsinissamut akisussaasuunissamut.

Kapitali 7

Licensi, tunniussineq il.il.

§ 40. Ilisserusiap nalunaarsorneqarnera inummut allamut tunniunneqarsimappat, licensi tunniunneqarsimassaaq, ilisserusiap nalunaarsorneqarnera taarsigassarsianut sallunaveequsiunneqarsimappat, ilisserusiap nalunaarsorneqaataa akiliutigineqarsimassaaq, imaluunniit ilisserusiamik nalunaarsorneqarneranit piginnittoq akiliisinnaajunnaartutut suliasanngortinneqarsimappat, tamanna qinnuteqaateqartoqarneratigut ilisserusianik nalunaarsuiffianni ilanngunneqassaaq.

Imm. 2. Uppernarsarneqarpat, licensi nalunaarsorneqarsimasooq atorunnaarsimasooq, licensi nalunaarsuiffimmit peerneqassaaq.

Imm. 3. Imm. 1 aamma 2-mi aalajangersakkat aamma atuupput pinngittaaliissummik licensimut aamma § 48, imm. 2 naapertorlugu piginnaatitaaffinnut.

Imm. 4. Ilisserusiap nalunaarsorneqarneranut tunngasunik eqqartuussivimmut suliasanngortitsinermit tamatigut suliasanngortinneqarsinnaavoq, nalunaarsuiffimmi ilisserusiap nalunaarsorneqarneranit piginnittutut allassimasooq, aamma nioqqusiat nutaatut illersorneqarnerat pillugu oqartussanit nalunaarutit taassumunnga nassiunneqarsinnaapput.

§ 41. Pilersitaq nalunaarsorneqarsimasooq, ilisserusiap nalunaarsorneqarneraniit ukiut 3-t aamma ilisserusiap nalunaarsorneqarnissaanik qinnuteqaatip tunniunneraniit ukiut 4-t ingerlareerneranni, nunami maani annertunerusumik suliarineqanngippat, inuk, nunami maani pilersitamik suliarinninniartoq, taamaaliornissaminut licensissarsisinnaavoq pinngitsaaliissummik, taamaaliortoqannginnissaanut allatut ittumik peqqutissaqartoqavinnngippat.

Imm. 2. Økonomi- og erhvervsministerip aalajangersinnaavaa, nunami allami suliarinninneq nunami maani suliarinninnermut naligiissinneqarnissaa imm. 1-imi aalajangersakkamik atuinermi. Taamatut aalajangersagaq piumasaqaatitalimmik illugiilluni suliarineqarsinnaavoq.

§ 42. Ilisserusiamik nalunaarsorneqarsimasumik piginnittoq, taanna atorniaaraanni nioqqusiap nutaatut illersorneqarnera imaluunniit ilisserusiap nalunaarsorneqarnera, allamit pigineqartoq,

ilaasariaqartoq, taassuminnga kingulliullugu taaneqartumik atuinissaminut nassaatut isumassarsiamik nioqqusiatut nutaatut illersorneqartumik imaluunniit pilersitamik ilisserusiatut nalunaarneqarnermigut illersorneqartumik pilersitamik, pilersitaq siullugu taaneqartoq pingaarutilimmik teknikkikkut siuaritaasimappat annertuumik aningaasarsiornikkut sunniuteqartoq.

Imm. 2. Nassaatut isumassarsiamut nioqqusiatut nutaatut illersorneqaataanik imaluunniit ilisserusiap nalunaarsorneqarneranik piginnittoq, imm. 1-imi aalajangersagaq naapertorlugu atorneqarnissaa pinngitsaaliissummik licensilerlugu nalunaarutigineqarsimasoq, pissutsit naapertuuttut malillugit pinngitsaaliissummik licensissarsisinnaavoq pilersitap aappaanik atuinissaminut.

§ 43. Soqutigisat pingaarutillit nalinginnaasut pisariaqartippassuk, inuk, pilersitamik inuussutissarsiutitut atuniartoq, inummit allamit ilisserusiap nalunaarsorneqarneranik pigineqartumik, tamatumunnga licensimik pinngitsaaliissummik pisinnaavoq.

§ 44. Inuk, ilisserusiap nalunaarsorneqarnissaanut qinnuteqaat tamanit pissarsiarineqarsinnaangormat, nunami maani taassuminnga pilersitamik inuussutissarsiutigalugu atuisoq, ilisserusiatut nalunaarsorneqarnissaanik qinnutigineqartumik, qinnuteqaat ilisserusiap nalunaarsorneqarneranik kinguneqarpat, atuinermut licensimik pinngitsaaliissummik pisinnaavoq, tamatumunnga immikkut ittunik peqquteqarnera ersarippat, aamma inuk taanna qinnuteqaammut ilisimasaqanngippat aamma taamatut ilisimasaqalernissaminut pissarseriaannaarpasinnigippat. Taamatut pisinnaatitaaffeqalerneq aamma assinganik atuuttarpoq inummut, nunami maani pilersitamik inuussutissarsiutitut atuinissaminut annertuumik iliuseqarsimasumut.

Imm. 2. Licensimut pinngitsaaliissummik taamaattumut ilisserusiap nalunaarsorneqarnera sioqqulluguli atorneqarsinnaavoq.

Imm. 3. Økonomi- og erhvervsministerip aalajangersinnaavaa, imm. 1-imi aalajangersakkap atornerani nunami allami atuneq nunami maani atuinermut naligitinneqassasoq. Taamatut aalajangersagaq illugiilluni piunasaqaatitalimmik suliarineqarsinnaavoq.

§ 45. Licensi pinngitsaaliissutit nalunaarutigineqarneranik taamaallaat pissarsisinnaavoq inuk, isumaqatigiissuteqarnikkut naleqquttumik tunngaveqarluni licensimik pissarsisinnaangitsaq, aamma nalilerneqartoq pilersitamik atuisasoq naleqquttumik aamma illersorneqarsinnaasumik pissuseqarluni aamma licensimut napertuuttumik.

Imm. 2. Licensi pinngitsaaliissutit ajoqutaanngilaq, ilisserusiap nalunaarsorneqarneranik piginnittup nammineq pilersitamik atuinissaanut imaluunniit allat licensissaanik nalunaaruteqarnissaannut.

Imm. 3. Licensi pinngitsaaliissutit taamaallaat allanut tunniunneqarsinnaavoq ingerlatsivik atorneqarfigisaa peqatigitillugu, imaluunniit atorneqarfissaatut siunertarinqartoq. § 42, imm. 1 malillugu licensimik pinngitsaaliissummik nalunaarutinut, aamma atuuppoq, licensimik pinngitsaaliissummik tunniussineq pissasoq ilisserusiap nalunaarsorneqarneranut peqataatillugu, atorneranut pisariaqarpat nioqqusiatut nutaatut illersorneqarnera imaluunniit ilisserusiap nalunaarsorneqarnera, allamit pigineqartoq.

Imm. 4. Licensi pinngitsaaliissutit halvlederteknologi-mut tunngatillugu taamaallaat nalunaarutigineqarsinnaavoq tamanut ammasumik niuerpalaanngitsumik atuinermut imaluunniit unammillernermik killiliiniarluni pissusilersornermut, eqqartuussivikkut aalajangerneqarsimasoq imaluunniit aqutsinikkut aalajangerneqarsimasoq, atorunnaarsinniarlugu.

Nalunaarsorneqarsimanerup atorunnaarnera, aqutsinikkut misiliineq il.il.

§ 47. Ilisserusiamik nalunaarsuineq eqqartuussivikkut atunngitsuutinneqarsinnaavoq

- 1) nalunaarsuineq §§ 1-5 naapertorlugit pisimanngippat,
- 2) nalunaarsuineq pilersitamut tunngappat, ersarinngitsumik allaaserineqarnera pissutaalluni suliamut ilisimasallip taanna tunngavigalugu suliarisinnaanagu,
- 3) illersorneqarnera § 18-imut naapertuutinngitsumik allanngortinneqarpat imaluunniit
- 4) illersorneqarnera nalunaarsorneqareernerani annertusineqarpat.

Imm. 2. Ilisserusiamik piginnittoq taamaallaat ilisserusiap nalunaarsorneqarnerata ilaannakortaannaannut piginnaatitaaffeqarpat, ilisserusiap nalunaarsorsimaneqarnera tamarmiulluni atunngitsuutinneqarsinnaanngilaq.

Imm. 3. Suliaq kimilluunniit suliassanngortinneqarsinnaavoq, pissutsilli imm. 4-mi taaneqartut ilanngunnagit.

Imm. 4. Suliat, peqqutilerneqarsimasut, taamaallaat suliassanngortinneqarsinnaapput inummit, ilisserusiap nalunaarsorneqarsimanerani piginnaatitaaffeqarnerartumit. Suliaq suliassiissutigineqassaaq piginnaatitaaffeqartup ilisserusiap nalunaarsorneqarnerani paasisaqarneraniit aamma pissutsit allat, suliakkiinnermut peqqutaaqataasut paasineraniit kingusinnerpaamik ukiup 1-ip kingorna. Ilisserusiap nalunaarsorneqarnerani piginnittoq, ilisserusiap nalunaarsorneqarnerani ajortumik isumaqanngippat, imaluunniit ilisserusiaq nalunaarsorneqarnerani pigami, suliaq suliassanngortinneqarsinnaanngilaq ilisserusiap nalunaarsorneqarneraniit ukiut 3-t kingorna.

§ 48. Ilisserusiaq nalunaarsorneqarsimappat inummut § 1 naapertorlugu tamatumunnga piginnaatitaaffeqanngitsumut, eqqartuussivik, tamanna pillugu piginnaatitaaffeqartumit akerliliilluni oqaaseqaateqartoqarpat, ilisserusiap nalunaarsorsimaneqarnera tassunga nuussavaat. Suliaq suliarineranut piffissaq pillugu § 47, imm. 4-mi aalajangersakkat assinganik atuupput.

Imm. 2. Taanna, ilisserusiap nalunaarsorneqarnerani piaaffigineqartoq, ajortumik isumaqarani nunami maani ilisserusiamik inuussutissarsiutigalugu atuisimasoq imaluunniit taamaaliornissaminut annertuumik iliuseqarsimasoq, naleqquttumik akiliuteqarluni aamma atugassaritaasuni naleqquttuni aallartissimasaminik ingerlatsiinarnissaminut imaluunniit piareersarsimasaminik aallartitsinissaminut pisinnaatitaavoq taassuma immikkoorutaanik nalinginnaasunik atatitsiinnarluni atuinissaminut. Taamatut piginnaatitaaffeqarneq aamma assinganik atugassartaqarluni atuuppoq licensimik piginnaatitaaffeqartut nalunaarsorneqarnerannik peqartunit.

Imm. 3. Imm. 2 naapertorlugu piginnaatitaaffiit taamaallaat allanut nuussinnaapput ingerlatsivik, atorneqarfisani, imaluunniit atorneqarfissatut siunneqarfini peqatigalugu.

§ 49. Ilisserusiap nalunaarsorneqarnerani piginnittoq nioqqusiat nutaatut illersorneqarnerat pillugu oqartussanut ilisserusiap nalunaarsorneqarnerani taamaatitsippat, nioqqusiat nutaatut illersorneqarnerat pillugu oqartussat nalunaarutigissavaat ilisserusiap nalunaarsorsimaneqarnera tamarmiulluni atorunnaarsinneqartoq.

Imm. 2. Ilisserusiap nalunaarsorneqarnerata nuunneqarnera pillugu eqqartuussisunut suliassanngortitsisoqarsimappat, ilisserusiap nalunaarsorsimaneqarnera, eqqartuussisunut suliassanngortitap inaarutaasumik aalajangiiffigineqannginnerani atorunnaarsinneqarsinnaanngilaq.

§ 50. Ilisserusiaq nalunaarsorneqareeraangat, kinaluunniit akiliummik akiliuteqarnermigut nioqqusiat nutaatut illersorneqarnissaat pillugu oqartussanut nalunaarsuisimanerup misilinneqarnissaanik piumasaqarluni saqqummiussisinnaavoq.

Imm. 2. Misiliisoqarnissaanik piunasaqarneq taamaallaat § 47, imm. 1-imi atorsinnaannginnermut pequtitut taaneqartut tunngavigalugit pisinnaavoq.

Imm. 3. Nioqqusiat nutaatut illersorneqarnissaat pillugu oqartussat imm. 1 malillugu piunasaqarnermut uppersaammik ilaqartinneqarnissaanik piunasaqaateqarsinnaapput.

Imm. 4. Ilisserusiap nalunaarsorsimaneqarnera pillugu suliamik eqqartuussivinnut suliaasiisoqarpat, suli nalunaarsuineq taanna pillugu imm. 1 malillugu piunasaqarsimanermut aalajangiisoqanngitsoq, nioqqusiat nutaatut illersorneqarnissaat pillugu oqartussat qinnuteqaateqaresimanermik suliarfik unitsissavaat, suliaq inaarutaasumik aalajangiiffigineqarnissaata tungaanut, piunasaqarsimaneq ilisserusiamik piginnittuanit saqqummiunneqarsimanngippat.

§ 51. § 50 malillugu piunasaqartoqarsimappat, ilisserusiamik piginnittoq tamatuminnga ilisimatinneqassaaq tamannalu pillugu oqaaseqaateqarnissaminut periarfissinneqassalluni. Tamatumunnga økonomi- og erhvervsministeri malittarisassanik aalajangersaassaaq.

§ 52. Nioqqusiat nutaatut illersorneqarnissaat pillugu oqartussat § 50 naapertorlugu piunasaqarnermik tunniussisoqarnerata kingorna paasisaqarunik, nalunaarsuinissamut ajoqutaasoqartoq, nalunaarsuisimaneq atorunnaarsinneqassaaq. Nalunaarsuinerup atorunnaarnera Patent- og Varemærkestyrelsimkit nalunaarutigineqassaaq, aalajangiineq pereeraangat.

Imm. 2. Ilisserusiap nalunaarsorsimaneqarneranut ajoqutissartaqanngippat ilusaa allanngortillugu atatiinnarneqarnissaanut, nioqqusiat nutaatut illersorneqarnissaat pillugu oqartussat nalunaarsorsimanerup allanngortinnissaa aalajangissavaat, ilisserusiamik piginnittoq oqaasertaasa allanngortinneqarnerannut, nioqqusiat nutaatut illersorneqarnissaat pillugu oqartussat ilisserusiap nalunaarsorneqarneranut oqaasertaritinniagaanut isumaqataappat, aamma allannguiineq pillugu nalunaaruteqarnermut akiluitaasartoq akilerneqarpat piffissaliullugu aalajangerneqarsimasooq qaaniutsinnagu.

Imm. 3. Ilisserusiamik piginnittoq oqaasertaanut allanngortinneqarsimasunut isumaqataanngippat imaluunniit allanngortitsineq pillugu nalunaaruteqarnermut akiliutaasartoq piffissaagallartillugu akilinngippagu, ilisserusiap nalunaarsorneqarsimaneq atorunnaarsinneqassaaq.

Kapitali 9

Ilisserusiaq pillugu paasisutissanik tunniussisussaatitaaneq

§ 53. Ilisserusiap nalunaarsorneqarnissaanik qinnuteqartoq imaluunniit piginnittoq, allagartat nalunaarsuinermut tunngasut suli tamanit pissarsiarineqarsinnaanngunngitsut, inummut allamut ilisserusiamik nalunaarsorneqarnissaanik qinnuteqaammut imaluunniit ilisserusiamik nalunaarsorneqarsimasumik patsisilersuuteqartoq, pineqartup qinnuteqaatitut suliameq allagartanut ilisimasaqalernissaanut, pisussaaffeqarpoq qinnuteqaateqarfigineqarnermigut akuersissuteqarnissaminut. Qinnuteqaat atortumik biologiskiusumik toqqorneqarsimasumik ilaqarpat § 15, imm. 1-imi taaneqartumik, pineqartoq misiliummik aamma pisinnaatitaavoq. § 24, imm. 6, 2. aamma 3. pkt.-imi aamma imm. 7-9-mi aalajangersakkat taamaattoqartillugu atuupput.

Imm. 2. Inuk, inummut allamut toqqaannartumik saaffiginninnermigut imaluunniit annoncetigut imaluunniit tunisassianut imaluunniit taakku poortuutaannut allattukkatigut imaluunniit allatut nalunaarpat, ilisserusiap nalunaarsorneqarnissaa qinnutigineqarsimasooq imaluunniit nalunaarsorneqarsimasooq, peqatigitillugu ilisserusiap nalunaarsorneqarnermut imaluunniit qinnuteqarnermut normua nalunaarnagu, pisussaaffeqarpoq pisariaqanngitsumik utaqqisitseqqaarani, taassuminnga qinnuteqaateqartoq, taamaattumik paasisutissamik tunissallugu.

Ersarissumik nalunaarneqanngippat, ilisserusiap nalunaarsorneqarnissaanik qinnuteqartoqarsimasoq imaluunniit nalunaarsuisoqarsimasoq, kisianni paasissutissap isumaqarnarsitippagu, taamaattoqanngitsoq, pisariaqanngitsumik utaqqisitseqqaarani qinnuteqaatigineqarneratigut paasissutissiisoqassaaq, ilisserusiap nalunaarsorneqarnissaa qinnuteqaatigineqarsimanersoq imaluunniit nalunaarsorneqarsimanersoq.

Kapitali 10

Pineqaatissiisutit aamma taarsiissuteqarnissamut akisussaaffeqarneq il.il.

§ 54. Akiliisitaanermik pineqaatissinneqassaaq inuk, ilisserusiap nalunaarsorneqarnerata nassatarisaanik kisermaassisussaataitanermut (brugsmoelindgrib/ilisserusiamut akulerunneq) piaaraluni imaluunniit mianersuaalliorujussuarluni akuliuttoq.

Imm. 2. Unioqquitsineq piaaraluni imaluunniit pissutsit sukannernerulersitsippata, Kalaallit Nunaanni pinerluttulerinermi inatsit malillugu pineqaatissiisoqarsinnaavoq. Pissutsit sukannernerulersitsisut tassaaneruserput, unioqquitsinermi annertuumik aamma ersarissumik inatsisinut akerliusumik iluanaarniarneq.

Imm. 3. Ingerlatseqatigiiffiit il.il. (taakku sinnerlugit inatsisitigut ingerlatsisuusut) pillaatissanut akisussaatinneqarsinnaapput Kalaallit Nunaanni pinerluttulerinermik inatsimmi kapitalit 5-mianni malittarisassat malillugit.

Imm. 4. Unioqquitsinerit imm.1-imi pineqartut, eqqunngitsuliorfigisaasumit unnerluutigineqassapput, unioqquitsinerit imm. 2-mi pineqartut, eqqunngitsuliorfigineqartumit aatsaat qinnuteqaatigineqarlutik unnerluutigineqassapput, nalinginnaasumik soqutigittarneq tunngavigalugu unnerluussineq pisariaqalinnngippat.

§ 55. Inuk, piaaraluni imaluunniit mianersuaalliorujussuarluni ilisserusiamut akuleruttoq, akiliissaaq

- 1) atuinermi eqqunngitsuliorfigineqartumut akissarsiassanik naleqquttunik aamma
- 2) unioqquitsinerup kingunerisaanik ajoquseeqqinnermut eqqunngitsuliorfigineqartumut taarsiissutit.

Imm. 2. Imm. 1, nr. 2 malillugu taarsiissutinik aalajangiinermi, ilaatigut ilanngullugit isiginiarneqassapput eqqunngitsuliorfigineqartup iluanaarutissat annaasai aamma nikanarsaasup tunngavissaqanngitsumik iluanaarutai.

Imm. 3. Suliani, imm. 1-imi pineqartuni, tamatuma saniatigut eqqunngitsuliorfigineqartumut taartisiassanik aalajangiisoqarsinnaavoq ajoqusiinernut aningaasanut tunngasuunngitsunut.

§ 56. Ilisserusiamut akulerunnerup annertusinerunissaa pinaveersaartinniarlugu eqqartuussivik akerliliilluni oqaaseqaateqartoqarnerata kingorna ilaatigut aalajangersinnaavoq, piliaq, ilisserusiatut nalunaarsorneqarsimasoq akuleruffigineqartoq

- 1) niuerfinniit utertinneqassasoq,
- 2) niuerfinniit peerneqavissasoq,
- 3) piuneerutinneqassasoq,
- 4) eqqunngitsuliorfigineqartumut tunniunneqassasoq imaluunniit
- 5) ersarinnerusumik nalunaarutigineqartutut allanngortinneqassasoq.

Imm. 2. Imm. 1 assinganik atuuppoq atortussanut, atortunut, sakkuutinut imal. assigisaanut, taamaallaat inatsisinik unioqquitsilluni pilersitamik nalunaarsorneqarsimasumik piliornermik atornerarnerusimasut.

Imm. 3. Imm. 1 malillugu pineqaatissiinerit nikanarsaasumit taartisiassartaqanngitsumik naammassineqassapput aamma eqqunngitsuliorfigineqartumut taarsiissutitut attuumassuteqanngillat. Pineqaatissiinerit naammassineqassapput nikanarsaasumut tuttussanngorlugit, pissutsit immikkut ittut tamatumunnga akerliunngippata.

Imm. 4. Imm. 1 malillugu pineqaatissiilluni eqqartuussinermi nikanarsaanerup annertussusaata, iliuusissatut peqqussutigineqarsimasut aamma pingajuusutut inissisimasup soqutigisaasa akunneranni pissutsit eqqartuussiviup isiginiassavai.

Imm. 5. Nikanarsaasup akerliliilluni oqaaseqaateqarnerata kingorna eqqartuussivik akuersissuteqarsinnaavoq imm. 1 aamma 2-mi taaneqartut tunisassiat, atortussiat, atortut, sakkuutit imal. Assigisai ilisserusiap atuunnerata nalaani imaluunniit taakku ilaannai naleqquttumik akiliuteqarnermigut tigummissagai. Tamannali taamaallaat atuuppoq

- 1) nikanarsaasooq iliuuseqarsimanngippat piaaraluni imaluunniit mianersuaalliorluni,
- 2) imm. 1 malillugu pineqaatissiinerim nikanarsaasooq ajoquserneqarpallaassappat aamma
- 3) akissarsiarititassaq naleqquttoq naammappat.

§ 57. Inuup tunngavissaqarani pilersitaq inuussutissarsiutitut atorpagu, suliami qinnuteqaammi suliap allagartai tamanit pissarsiarineqarsinnaanngortinneqarnerisa kingorna, aamma qinnuteqaat ilisserusiap nalunaarsorneqarneranik kinguneqarpat, ilisserusiamut akulerunneq pillugu aalajangersakkat assinganik atuupput § 54 minillugu. Piffissami, ilisserusiap nalunaarsorneqarnissaata tungaanut, taamaallaat ilisserusiatut illersorneqarpoq, ilisserusiap nalunaarsorneqarnermut piumasaaqaatitaani allassimasut, taamaallutik, qinnuteqaat tamanit pissarsiarineqarsinnaanngormat, ilisserusiap nalunaarsorneqaataatut, nalunaarsorneqarneratut imaluunniit § 52, imm. 2 malillugu ilusaa allannortillugu atatiinnarneqarneratut.

Imm. 2. Pineqartup akulerunnerup kingunerisaanik ajoqusiineq § 55, imm. 2 malillugu taamaallaat taarsiissutininik akilissavaa, § 21 malillugu ilisserusiap nalunaarsorneqarnera sioqqullugu pisimasut, naapertuuttumik annertussusilerlugit.

Imm. 3. Imm. 1 malillugu taarsiivigittinniarnerit aatsaat pisoqalivallaarsinnaapput siusinnerpaamik nalunaarsuinermit ukiup 1-ip kingorna.

§ 58. Eqqartuussinermi inuk §§ 55 aamma 56 malillugit eqqartuunneqarpat, eqqartuussiviup qinnuteqaateqartoqarneratigut aalajangersinnaavaa, eqqartuussinerep tamarmiulluni imaluunniit naalisagartaa tamanit pissarsiarineqarsinnaanngortinneqassanersoq.

Imm. 2. Tamanut pissarsiarineqarsinnaanngortitsinissamut pisussaaffik nikanarsaasumiippoq. Tamanut pissarsiarineqarsinnaanngortitsineq nikanarsaasup akiligassaraa aamma ima ersaritsigissaaq pissarsiariuminartuulluni.

§ 59. Inuk, ilisserusiap nalunaarsorneqarnerata tamarmiulluni imaluunniit ilaannakuulluni atortussaatinnginneqarnissaa pillugu imaluunniit nalunaarsuinerup nuunneqarnera pillugu eqqartuussivimmuut suliaannngortitsisoq, tamatuminnga Patent- og Varemærkestyrelsimut nalunaarutigissavaa ilisserusianik nalunaarsuiffimmuut ilanngunneqarnissaa pillugu kiisalu eqqartuussivimmuut suliaassiissuteqarsimaneq pillugu licensimik pigisaqartunut tamanut, ilisserusiat nalunaarsorsimaffianni najugaat ilanngullugit ilanngunneqarsimasunut allakkatut tammatsaalisatut nassiullugit. Licensimik piginnittoq, ilisserusiamut piginnaatitaaffeqarnermut akulerunnerit pillugit eqqartuussivimmuut suliaannngortitsisoq, assinganik tamanna pillugu ilisserusiamik piginnittumut nalunaaruteqassaaq.

Imm. 2. Eqqartuussivimmuut suliaakkiissuteqartup aggeqqusissummini uppenarsanngippagu, nalunaarneq nalunaarutillu imm. 1-imi nalunaarneqartut pisimanersut, eqqartuussivik piffissamik

aalajangiisinnaavoq piunasaqaatit eqquutinneqarnissaannut. Piffissaq aalajangerneqarsimasooq qaangerneqarpat suliaq itigartitsissutigineqassaaq.

Imm. 3. Ilisserusiamut akulerunneq pillugu suliani, ilisserusiamik piginnittumit suliaassanngortinneqartuni, imm. 1-imi malittarisassat malillugit unnerluutiginnittoq nioqqusiat nutaatut illersorneqarnissaat pillugu oqartussanut aamma licensimik peqartut nalunaarsorneqarsimasunut nalunaaruteqassaaq, akerliliilluni oqaaseqaatigisimasaminik suliaq taamaatinniaruniuk, ilisserusiap nalunaarsorneqarsimaneramik atorsinnaannginneraasimanini. Imm. 2-mi aalajangersagaq assinganik atuutissaaq, akerliliilluni oqaaseqaatigineqartoq, ilisserusiap nalunaarsorneqarnerata atorsinnaannginnerarneqarnera itigartinneqarpat, piffissaliussatut aalajangerneqartoq qaangerneqarpat.

Imm. 4. Ilisserusiamut akulerunneq pillugu suliani, licensimik piginnittumit suliaassanngortinneqartuni, unnerluutiginnittumit ilisserusiamik piginnittoq ilanngullugu suliaassanngortinneqarsinnaavoq, taassuma eqqartuussivik suliamik suliarinnittua soqutiginagu akerliliilluni oqaaseqaatiginninneq atorunnaarsissinnaavaa, ilisserusiap nalunaarsorneqarnerata atorsinnaannginnerarneqarsimanera. Kalaallit Nunaanni eqqartuussisarnermik inatsimmi kapitali 19-imi isumaqatigiinniarneq pingarneq pillugu aalajangersakkat assinganik atuutissapput.

§ 60. Inuk § 53-imi iliuuserineqaqqusaasunut taaneqartunut, pineqartup pisussaaffigisaanut, malinninngitsooq, imaluunniit eqqunngitsunik paasissutissiisooq, akiliisitaanermik pillarneqassaaq, inatsit alla malillugu sakkortunerusumik pillagassaataitaanngikkuni, taakkunungalugu ajoqusikkaminut naleqquttutut annertussusilerneqarsorinartunik taarsiissussaataitaalluni.

Imm. 2. § 54, imm. 3 aamma 4 assinganik atuupput.

§ 61. Qinnuteqartut aamma ilisserusiamik piginnittut, nunami maani najugaqanngitsut, inatsit manna malillugu unnerluutigineqartut, Københavnimi eqqartuussisoqarfeqartutut naatsorsuunneqassapput.

Imm. 2. Eqqartuussivinnit takussutissiat, ilisserusiap nalunaarsorneqarnissaanik qinnuteqaatinut imaluunniit ilisserusiat nalunaarsorneqarnerannut tunngasut, eqqartuussiviup iliuuseqarneratigut Patent- og Varemærkestyrelsimut nassiunneqassapput.

61 a. § 54-imi pineqartunik nikanarsaasoqarsimanerarlugu akitsuusiinermik akileraaruserinermillu allattoqarfik kalerrinneqaruni, tamanna pillugu paasissutissat piginnaatitaaffeqartumut ingerlateqqinneqassapput.

Kapitali 10

Aalajangersakkat assigiinngitsut

§ 62. Patent- og Varemærkestyrelsi ilisserusiamik piginnittumut kajumissaarisinnaavoq Det Europæiske Økonomiske Samarbejdsområdemittumik (EØS) fuldmægtigimik imaluunniit Kalaallit Nunaanni nunalimmik toqqaqqullugu, ilisserusiamik piginnittoq sinnerlugu ilisserusiamut nalunaarsorneqarsimasumut tunngatillugu nalunaarutiniq tigusaqartartussamik. Fuldmægtigip aqqa najugaalu ilisserusiat nalunaarsorsimaffiannut ilanngunneqassaaq.

§ 63. §§ 40, 66 aamma 67 naapertorlugu styrelsip aalajangiinerinut naammagittaalliut qinnuteqartumit, ilisserusiamik piginnittumit imaluunniit inummit, misiliisoqarnissaanik qinnuteqaateqarsimasumit, pineqartup ilisimatinneqarneraniit kingusinnerpaamik qaammatit 2-t kingorna Ankenævnet for Patenter og Varemærker-imut tunniunneqassaaq. Inuit allat,

aalajangiinnermut pineqartumut soqutigisaqartut, kingusinnerpaamik qaammatit 2-t kingorna, aalajangiinerup nalunaarutigineqarneraniit, naammagittaalliummik assigisaanik tunniussisinnaapput.

Imm. 2. Imm. 1-imi piffissaliunneqartoq taaneqarsimasoq qaangiutsinnagu naammagittaalliummut akiliutaasartoq aalajangerneqarsimasoq akilerneqassaaq. Tamanna pinngippat, naammagittaalliut itigartinneqassaaq.

Imm. 3. § 25, imm. 2-4-mi aalajangersakkat assinganik atuupput.

§ 64. Økonomi- og erhvervsministeri ilisserusiat nalunaarsorneqarnissaanik qinnuteqaatinut taakkulu suliarineqartarnerannut aamma misiliinissamik piumasaqarnerit suliarineqartarnerannut, pilersitseqqinninnernut, ilisserusiap nalunaarsornerneqarneranik taamaatitsinnernut, ilisserusianik nalunaarsuiffiup ilusilersugaaneranut aqunneqarneranullu, Brugsmodeltidendep saqqummertarneranut imarisaanullu, nioqqusiat nutaatut illersorneqarnerannut oqartussanik paasissutissanik qarasaasiakkut paarlaasseqatigiittarnernut kiisalu styrelsip suleriaasaanut malittarisassanik ersarinnerusunik aalajangersaasaaq. Tassunga ilanngullugu aalajangerneqarsinnaavoq, nioqqusiat nutaatut illersorneqarnerannut oqartussat qinnuteqaatinut takkussimasunut nalunaarsuiffiata tamanit pissarsiarineqarsinnaasuunissaa. Økonomi- og erhvervsministeri malittarisassanik ersarinnerusunik, nioqqusiat nutaatut illersorneqarnerannut oqartussaqaarfiup ullut sorliit matoqqaffigissanerai aalajangersakkanik aalajangiisinnaavoq.

Imm. 2. Økonomi- og erhvervsministerip aalajangersinnaavaa, nioqqusiat nutaatut illersorneqarnerannut oqartussat nunat allat oqartussaanut qinnuteqaateqarfigineqarnermikkut ilisserusiat nalunaarsorneqarnissaanik qinnuteqaatit maani tunniunneqartut suliarineqarnerat pillugu paasissutissanik tunniussisinnaanersut, kiisalu nioqqusiat nutaatut illersorneqarnerannut oqartussat, ilisserusiat nalunaarsorneqarsinnaassuseqarnerannik piumasqaatit pillugit nutaaliarineqarsimanermut misissorneqarnissaannik aalajangiineranni, naak nunap allap oqartussaanut imaluunniit nunat tamat akornanni tunngasunut pisortaqaarfimmit taama pineqareeraluartut.

Imm. 3. Økonomi- og erhvervsministerip aamma aalajangersinnaavaa, qinnuteqartut, nunami allami ilisserusiap nalunaarsorneqarnissaanik qinnuteqaatip assinganik tunniussisimasut, nioqqusiat nutaatut illersorneqarnerannut oqartussanik qinnuteqaateqarfigineqarnermikkut taassumalu piffissaliullugu aalajangersimasaata iluani pilersitap nalunaarsorneqarsinnaassusaata misissorneqarnerata inernerai pillugu paasissutissanik tunniussissanersooq, nunap pineqartup nioqqusiat nutaatut illersorneqarnerannut oqartussaanut qinnuteqartumut nalunaarutigineqarsimasunuk, kiisalu taassuminnga allaqatigiittarsimanermi allakkat assinginik nassiussissanersooq. Paasissutissiinissamulli pisussaaffik ilanngunneqarsinnaanngilaq kapitali 3-mi ilisserusiat nalunaarsorneqarnissaanik qinnuteqaatinut pineqartunut, nunat tamat akornanni piareersaataasumik misilinneqarsimasunut, taakkulu pillugit nioqqusiat nutaatut illersorneqarnerannut oqartussanut nalunaarusiamik tunniussisoqarnikuulluni.

§ 65. Patent- og Varemærkestyrelsip qinnuigineqarnermigut suliassat immikkut ittut, ilisserusianut ilisserusianullu kisermaassisussaataitanermut tunngasut suliarisinnaavai. Økonomi- og erhvervsministeri kiffartuussinnermut tassunga tassungalu akiliutaasussat pillugit malittarisassanik aalajangersaasaaq kiisalu akiliinngitsoornermi akileeqqusissutinik allagaqarnermut akiliutaasartumik akiliinissamut.

Imm. 2. Suliassanut imm. 1, 1. pkt.-imi taaaneqartunut, innuttaasut ammasumik kiffartuunneqarnissaannut inatsit atuutinngilaq, § 4, imm. 2 minillugu, tassani piumasarineqarsinnaammat inuttut atugarisat uppersaatini taaneqarnissaannik ilisimatinneqarsinnaaneq.

§ 66. Ilisserusiap nalunaarsorneqarnissaanik qinnuteqartoq imaluunniit ilisserusiamik piginnittoq inatsisitigut annaasaqassappat, nioqqusiat nutaatut illersorneqarnissaat pillugu oqartussanit piffissaliunneqarsimasumik inatsimmut matumunnga imaluunniit tamatumunnga tunngaveqartumik malinninngitsuugaqarsimanini pissutigalugu, namminerminillu peqqissaarsinnaaneq piumasarineqarsinnaasooq tamaviaarluni takutissimagaluarlugu, nioqqusiat nutaatut illersorneqarnissaat pillugu oqartussat qinnuteqaatigineqarfigineqarnermikkut piginnaatitaaffiinik pilersitseqqissinnaavoq. Qinnuteqaateqarneq tunniunneqassaaq nioqqusiat nutaatut illersorneqarnissaat pillugu oqartussanut qaammatit 2-t qaangiutsinnagit, ajoqutaasimasup, piffissaliunneqartumut inortuisitsisup, atorunnaarneraniit, taamaattorli piffissaliunneqartup naaneraniit qaammatip 1-ip kingorna. Piffissaliunneqartumi tassani iliuuserinngitsoorsimasani suliarissavaa pilersitseqqinnermullu akiliutaasartoq aalajangersimasooq akilerlugu.

Imm. 2. Imm. 1 atuutissaaq § 11, imm. 1-imi tulleriaarinermi salliutinneqarnermut piffissartinneqartumut, ilisserusiap nalunaarsorneqarnissaanik qinnuteqaatereerluni tulleriaarinermi salliutinneqarnissap pilerseqqinneqarnissaanik qinnuteqaammik qinnuteqaateqaraanni § 11, imm. 1-imi piffissaliussap taaneqartup naaneraniit qaammatit 2-t ingerlareertinnagit.

§ 67. Nunat tamat akornanni ilisserusiap nalunaarsorneqarnissaanik qinnuteqaatip ingerlateqqinneqarnissaanik qinnuteqartup, tak. § 29, allakkerivikkut nassiussineq atorsimappagu, nassiussallu piffissaq eqqorlugu tikiunnatik, qaammatilli 2-t kingorna iliuuseqarpat, piffissaliunneqarsimasup qaangerneqarsimaneraniit qinnuteqartup paasisaqarneraniit imaluunniit paasisaqareertussaaneraniit, aamma piffissaliunneqartup naaneraniit kingusinnerpaamik ukiup 1-ip kingorna, nioqqusiat nutaatut illersorneqarnissaat pillugu oqartussat piginnaatitaaffiinik pilersitseqqissapput, ima pisoqarsimappat

- 1) piffissaliunneqarsimasup naanissaa sioqqullugu ullut kingulliit 10-t iluanni allakkanik nassiussinerit unitsinneqarsimappata sorsunneq, mumisitsineq, innuttaasut eqqissiviilliornerat, suliumajunnaarneq, ajunaarnersuaq imaluunniit pissutsit allat assingusut tassani piffimmi peqquataallutik, nassitsisup ingerlatsiviuteqarfigisaani imaluunniit sumiiffigisaani, aamma nassiussassaaq nassiunneqarpat nioqqusiat nutaatut illersorneqarnissaat pillugu oqartussanut ullut 5-mit qaangiutsinnagit, allakkanik nassitsinerit ingerlaqqilerneranniit, imaluunniit
- 2) nassiussaq tammatsaalisatut nassiunneqarsimappat nioqqusiat nutaatut illersorneqarnissaat pillugu oqartussanut kingusinnerpaamik ullut 5-mit piffissaliunneqarsimasup naanissaa sioqqullugu, taamaallaalli nassiussaq timmisartukkut nassiunneqarsimappat, tamanna pisinnaappat, imaluunniit nassiussisooq pissutissaqarpat isumaqassalluni, nassiussat allakkat nalinginnaasumik angallanneqarneranni ulloq nassiunneqarnerminniit kingusinnerpaamik ullut 2-t kingorna tiguneqariissasut.

Imm. 2. Ilisserusiap nalunaarsorneqarnissaanik qinnuteqartoq imm. 1 naapertorlugu piginnaatitaaffiit pilerseqqinneqarnissaanik kissaateqarpat, tamanna pillugu qinnuteqarsimasooq piffissaliunneqarsimasup taaneqartup naannginnerani qinnuteqaateqarnerminik nioqqusiat nutaatut illersorneqarnissaat pillugu oqartussanut tunniussissaaq.

§ 68. §§ 66 imaluunniit 67 naapertorlugu pilersitseqqinnissamik qinnuteqaateqarsimaneq akuersarneqarsimagaangat tamatuma kingunerisaanik ilisserusiap nalunaarsorneqarnissaanik qinnuteqaat suliarinerata nanginnissaanut tiguneqassaaq imaluunniit ilisserusiamik nalunaarsuisimaneq atorunnaarsimasooq atortiinnarneqartutut naatsorsuunneqaraangat, tamanna pillugu nalunaarummik sanasoqassaaq.

Imm. 2. Inuk, qinnuteqaatip unitsinneqarsimasup pilerseqqinneqarnissaanut piffissaliussap naanerata kingorna, imaluunniit qinnuteqaatip itigartinneqarnerata kingorna, imaluunniit ilisserusiap nalunaarsorsimaneqarnerata atorunnaarneranik nalunaarutigineqarnerata kingorna, kisianni imm. 1 naapertorlugu nalunaarut suli naammassinngitsoq, ajortumik isumaqarani pilersitamik nunami maani inuussutissarsiutitut atuilluni aallartissimasoq imaaluunniit taamaaliornissaminut iliuuseqangaatsiarsimasoq atuinerminik ingerlatsiinnarsinnaavoq taassuma nalinginnaasumik immikkuullarissutaa atatiinnarlugu.

Imm. 3. Taanna imm. 2-mi pisinnaatitaaffik pineqartoq taamaallaat allanut ingerlateqqinneqarsinnaavoq ingerlatsivik pilerfigisaa peqatigitillugu, imaluunniit atorneqarfissaatut siunniunneqarfigisimasaa.

§ 69. Økonomi- og erhvervsministeri akiliutaasartut inatsimmi taaneqartunut annertussusissaanut il.il. aalajangersaasaq.

§ 70. Økonomi- og erhvervsministeri illersornissaqarnermut ministerimik aamma inatsiseqarnermut ministerimik isumaqatigiinniareernermit kingorna, inatsimmi matumani sorsunnermi atortunik taaneqartut suusserannut malittarisassanik aalajangersaasaq.

§ 71. Patent- og Varemærkestyrelsimut inatsit malillugu økonomi- og erhvervsministeri piginnaatitaanernik unitsitsippat, naammagittaalliorsinnaanermut malittarisassanik ministeri aalajangersaasaq, tassunga ilaalluni naammagittaalliuutit aqutsinermit oqartussanut qulliunerusunut ingerlateqqinneqarsinnaannginnerat.

§ 72. (Kalaallit Nunaannut atuutilersinneqanngilaq).

§ 73. (Kalaallit Nunaannut atuutilersinneqanngilaq).

Kapitali 12

Atuutilersitsinermit ikaarsaariarnermullu aalajangersakkat

§ 74. Peqqussut atuutilerpoq ulloq 1. juli 2010.01.29

§ 75. Maleruagassiat, ilisserusianut inatsit malillugu atulersinneqartut aamma Kalaallit Nunaannut atuupput.

Tunniunneqarpoq Christiansborg Slotimi, ulloq [ulloq qaammat ukioq]

MARGRETHE R.

/Lene Espersen

¹ EF-imi immikkoortukkaat illersorneqarnissaat pillugu Rådep peqqussutaani artikel 5 peqqussummut matumunnga ilanngutatut naqinneqarnikuvoq.

